

Visoki predstavnik Inzko se sastao sa češkim ministrom vanjskih poslova Zaorálekem



Visoki predstavnik Valentin Inzko i prvi zamjenik visokog predstavnika Bruce Berton sastali su se danas u Sarajevu s delegacijom Češke Republike koju je predvodio ministar vanjskih poslova Lubomír Zaorálek.

Tokom sastanka je razgovarano o najnovijim političkim dešavanjima u BiH, a posebno o obavezi vlasti da u potpunosti poštuju Mirovni sporazum, kao i o novoj fazi napora koje BiH poduzima, putem nedavno potpisanog reformskog programa, kako bi se pridružila Evropskoj uniji.

Visoki predstavnik je detaljno izvijestio češku delegaciju o nedavnim aktivnostima vlasti Republike Srpske u vezi s organiziranjem referenduma o državnom pravosuđu, što predstavlja direktno kršenje Dejtonskog mirovnog sporazuma. Visoki predstavnik je naglasio da ova inicijativa može zemlju voditi unatrag i da se mora ostaviti po strani kako bi se bosanskohercegovački lideri mogli fokusirati na istinske reforme i stvarne potrebe građana.

Visoki predstavnik Inzko izrazio je nadu da će reformski program, koji on bezrezervno podržava, poslužiti kao prijekopotreban podsticaj za provedbu dugoočekivanih reformi. "Izabrani lideri imaju jedinstvenu šansu da izaberu budućnost tako što će u najvećoj mogućoj mjeri iskoristiti inicijativu

Evropske unije i implementirati reformski program", rekao je visoki predstavnik.

On je zahvalio na kontinuiranoj podršci koju Češka Republika pruža Bosni i Hercegovini na njenom evroatlantskom putu i na njenoj podršci naporima međunarodne zajednice usmjerenim na osiguranje potpune implementacije Dejtonskog mirovnog sporazuma. Na sastanku je ministar vanjskih poslova Zaorálek izrazio podršku aktivnostima koje provodi OHR.